

Leames: en rei con tia valèda

Lprojet portà dant chisc dis pas-sé l'é stat volù da la Procuradora e da la Comunità de Fascia, aproà dal Consei General te una de la più bela e costrutiva discusions che l'assemblea abie mai fat enschin ades.

I é de na cincantina i joegn studenc fascegn, jà laureé o che é dò a se laure-èr, che à tout sù l projet che ge met sui joegn, sun sia potenzialitèdes e sun sie talenc. «L'é n projet unich tel Trentin per no fèr sciampèr demez i talenc da la val», l'à dit la conseiera de parità Eleonora Stenico. L'era jà stat metù ite te la cordanza de program che l Comun General à sotscriit co la provinzia de messèl passà, e ades l ciapa pian pian foja. Na vijion strategica a sostegn de la partezipazion sozièla e profescionèla di joegn a la vita e al svelup de la comunità. «Te tempes olache se stenta a investir tel studie, la spiega Claudia Mammani, consulenta del Studie RCF enciarièda de l'atuazion del projet, chiò no se vel creèr posc de lurier sorii per joegn che vegn fora da l'università, ma crescer l saer per se fèr lèrga tel marcià del lurier. Al di d'anché no l'é sorì cerner la facultà te anter duta la proponetes formatives de l'ateneo, e dapò l'Università de Trent la vèrda trop a l'internazionalità, co la



dopia laurea e i stages foradecà. L'é giust che i joegn i se fae n percors formatif che li mena ence dalonc, ma l'é polito che do i posse vegnir de outa te val con sia arpejon de cognoschenzes, per coltivèr la partegnuda a na comunità, ence dal pont de veduda lingüistich, a troèr chiò la oportunitèdes per valorisèr sia esperienzes de studie e de lurier fates utró, fèr crescer coscita chest teritorie».

I obietives operatives i é cater, se à tacà ite ades col prum, che fossa meter adum na banca de dac per cognoscer i joegn fascegn laureé. Do vegnarà na sort de monitoraggio per saer di percors formatives e profescionèi per aer coscita n chèder dei titoi de studie arjonc e che se pel meter a frut. Dò vegnarà ence metù a jir n event per l'orientament e l'ocupazion di joegn, sibie per didèr chi più joegn a cerner so strèda dò l diplom, e dò per ciolèr contac coi referenc del mond economic e de la profescions.

Te chest contest laora ence l Pian di joegn de raion, che te anter sia politiches per i joegn l'à metù ite per l'an che vegn n nef projet per rejonèr de

lurier, sporjer ai joegn cognoscenza tel ciamp del lurier, ge dèr informazions, i didèr a recognoscer sie talent e a l rencurèr.

La comunità, da man sia, l'arà ence chela sie doer: la cogn palesèr sia atrativa per i joegn che à fenì de studier, la cogn i didèr a troèr sia dimenjion tel ciamp sozièl, culturèl, profescionèl, con n eie particulèr a la femenes e a l'auto-imprenditorialità.

L Comun General, promotor e motor de la scomenzadiva, l lurarà per meter ensema chesta rei joegn-teritorie estra che tagnir i contac con chi joegn che enveze cern de se tramudèr utró a se dessegnèr sie davegnir, ence perché chela jent pel doventèr n meso prezios de promozion de la cultura fascèna e de si prodoc fora da la seides del teritorie enstes.

«Se trata de n projet che no arà mai fin, à dit amò la procuradora, n motor de la crescimonia sozièla e economica de la val che troa so fundament te la cognoscenza desche fator prinzipèl de competitività che veit ti joegn na ressorsa strategica per l svelup e l benesser de la comunità». *✂*

